



Digitized by the Internet Archive
in 2010 with funding from
Boston Public Library

57
DISCOVERS
SVR L'ESTAT PRESENT
des affaires de France.

A V ROY.

Adressé par le R de Guise

M. D C. X V.

Acc 84-546 (51)

DISCOVER

PRESENT

THE HISTORY OF THE

ROYAL

M. D. C. X. V.

3
DISCOVRS SVR L'ESTAT
present des affaires de France.

A V R O Y.

S I R E,

Puis que c'est le mal-heur du siecle, que les lettres sont aux meschans, ce que sont ordinairement les forests aux voleurs, leur seruans d'ombre & de couuerture pour executer leurs méchancetez souz des pretextes specieux: Je supplie tres-humblement vostre Majesté de me permettre que i'esloigne de ma professiõ le blâme que luy donnét ces malins escriuains, qui remplissent vostre Estat de libelles diffamatoires; & qui sous couleur de cinq ou six histoires mal recueillies, & malicieusement appliquees, osent impunément calomnier toute la forme du gouuernement de vostre Estat. Car aussi, Sire, puis que l'on sçait combien facilement les Conseils des Rois peuuent estre rendus suspects, & les plus malignes procedures des seditieux peuuent au contraire estre desguisees, par l'artifice des plumes, trépees dans le venin de la calomnie; si les gens de bié n'auoiét ceste cõsolatiõ, de pouuoir decouurir, par vn moyen tout contraire, l'artifice des meschãs & leurs mauuaises intentions. Il n'y auroit pas vn seul de vos bons & fidelles sujets dans vostre Royaume, qui ne desirast de bon cœur que les lettres y fussent pour iamais esteintes; & que nul ne peust escrire doresnauant, si ce n'est pour se plaindre, & pour regretter de voir ceste noble & loüable Faculté de s'exprimer en public, estre malheureusement auiourd'huy prostituee aux attentats & aux crimes de sedition, de felonnie, & de leze-Majesté. Les

années, & les malheurs passez, crient encor tous
 les iours dans nostre histoire pour nous le faire ouïr
 & à nostre posterité, que telles plumes maudites
 ont esté les flambeaux qui ont failly d'embraser cet
 Empire; estant très veritable, qu'elles ont princi-
 palement causé l'effusion du sang, & la pluspart
 des cruautéz que les François ont exercées les vns
 contre les autres. Et Dieu vueille par sa grace, que
 ces *Cassandres*, ces *Pleureurs Cendrins*, ces *Pacifiques*
 menteurs & seditieux, & autres tels Autheurs de
 ces escrits tragiques, faillent à leur dessein, & que
 ce qu'ils desirent n'aduienne point! Car la fin & le
 but qu'ils se sont proposez, Sire, c'est de calomnier
 la regence de la Reine, pour empescher les effects
 de sa tres-prudente & tres-heureuse administratiō;
 De troubler vostre mariage, & de l'empescher s'ils
 pouuoient. Et pour cet effect ils taschent d'animer
 contre vostre Majesté les Princes de vostre sang,
 De descrire publiquement le premier de vos Parle-
 ments, De vous mettre en defiance, & en ombrage
 de la fidelité, & du zele du peuple de vostre ville de
 Paris, la premiere de tout vostre Royaume, & de
 toute la Chrestienté. Ils trauaillent generalement à
 esmouuoir les peuples, s'efforçans de leur persua-
 der faussement, que vostre Estat est perdu s'ils ne
 le perdent eux-mesmes, & s'ils ne violent les loix
 du respect, & de la subiection qu'ils vous doiuent.
 Et à cela taschent-ils de paruenir, par le moyen du
 faux & maudit pretexte qu'ils prennent des desor-
 dres pour la pluspart imaginaires, lesquels toutes-
 fois ils descriuent comme s'ils estoient tous tragi-
 ques & sanglans, afin que faisant croire à vos peu-
 ples, que tout est renuersé & perdu, il soit loisible
 à chacun de vos subiets, de se rendre, non seulemēt

le iuge de vos plus secrets conseils, mais aussi l'ex-
 cuteur des plus iniustes entreprises que vos enne-
 mis pourroient susciter, comme il se faißt ordina-
 irement sous le pretexte du bié public. Leurs escrits
 publient assez ouuertemēt, & deuant tout le monde
 que c'est leur intention. Car autrement oseroient
 ils menacer cōme ils font, avec des paroles dignes
 d'estre chastiees par le feu du Ciel ? Oseroient-ils
 s'adresser à la Reine vostre treshonoree Dame &
 mere, avec vne effronterie diabolique pour luy
 crier, furieux & enragez qu'ils sont, *Qu'elle ne pourra
 point faire ce qu'elle veut ?* Qui est, Sire, en effect
 escrire publiquement, qu'il ne se fera rien de ce que
 vostre Majesté veut, puis que la Reine ne veut rien
 qu'avec vous, & pour vous, ains qu'avec tout vostre
 conseil, & pour le bien de vostre Estat. Et que si-
 gnifient ces mots funestes, *Que le peuple mal traitté
 murmure, & ne cherche que de se mettre en franchise ?*
 Sont-ce les paroles d'un François, & non plustost
 de quelque Demon, qui semble monté de l'abisme,
 pour prescher la subuersion de ceste Monarchie,
 & la ruine de tout le peuple François ? Car a-t'on
 iamais perdu les Estats, que sous le pretexte de la
 liberté des peuples, ny ruiné les peuples, que par le
 semblant qu'on a faißt de vouloir procurer leur
 bien ? Et ceste protestation pouuoit-elle venir que
 d'une ame toute desesperée, & toute esperduë du
 desir forcené de voir renuerser sans-dessus-dessous
 vostre Estat, lors que ce Pacifique qui jette tous-
 iours feu & flamme de rage & de desespoir, s'escrie
 avec fureur, *Adieu patience ?* Et le crie au nom des
 François, qu'il appelle, infame, & mauuais François
 qu'il est, *vn peuple capricieux ?* comme disant des Fran-
 çois par mespris, & avec opprobre, ce que l'Empe-

reur Adrian disoit des Egyptiens , *que c'estoit vne nation volage, qui estoit tousiours aux escoutes, tousiours emportee par les bruits, les plus legers, & tousiours mescon-
 tente de son Estat present.* Ces boute-feux descouurent assez le dessein qu'ils ont de rendre vostre Maiesté odieuse à son peuple , & de descrier deuant V. M. la fidelité de vos subiets ; osans, apres auoir appellé vos François, *vn peuple capricieux, & qui ne cherche que les moyens de se mettre en franchise :* osans, dy-je, sans craindre Dieu, ny le glaive de vostre Iustice, escrire seditieusement & fausement à la veuë de toute la Chrestienté, *que vostre Maiesté va perdre la raison dans la coupe de Circé, & que vous voulez degenerer de la vertu de vos ancestres.* Paroles qui tesmoignent fort bien, quel est le naturel de ces cœurs felons, du milieu desquels la passion les arrache , & qui iustifient suffisamment que les Autheurs de ces escrits seruēt V. M. comme ces anciens barbares seruoient leurs Dieux, en leur sacrifiant des chiens, & mettant vne partie de leur pieté à immoler & offrir des victimes ordinaires à l'impudence. Leur mauuaistié, leur passion, leur naturel factieux, la foiblesse, & l'impuissance de leurs esprits, se descouurent si clairement par leurs escrits , qu'il a semblé long temps que la guerison de tels phrenetiques dependoit du mespris qu'on feroit d'eux. On voit aussi clairemēt qu'ils escriuent le plus souuent des choses qu'ils ne sçauent point, & qu'ils peruertissent grossieremēt. Outre l'assurance infailible que les bons François donnent tous les iours publiquemēt de leur fidelité inuiolable à vostre seruice, laquelle toutes les nations estrāgeres, toutes les malices du siecle, toutes les puissāces du mōde ensemble, ne pourrōt iamais Dieu aidāt, esbrāler: laquelle aussi deteste ces escrits

outrageux, calomnieux, pleins de fiel & de venin, qui n'ont autre cōmencement qu'un chagrin plein de malice, & d'enuie; & se finissent tousiours, par le desespoir que leur donne la conscience, laquelle les combat, les accuse, & les declare conuaincus d'auoir merit  la mort, ayant escrit furieusement contre vostre Maie t , & s'estant efforcez de troubler la paix, & le repos de vostre Estat par l'insolence de leurs libelles. Mais d'autant que les plus constantes resolutions   bien faire, peuuent en fin s'ennuyer des desguisemens & des artifices continuels, dont on vse pour les esbranler, Il a est  iuste & raisonnable de passer l'esponge sur le fard, & d'oster le voile   ces escriuains seditieux. Qui sont tels, Sire, qu'il ne leur suffit pas de commettre un crime digne de mort, escriuans des libelles diffamatoires c tre vostre Maie t , contre celle de la Reyne vostre mere, contre les Princes & contre tous les principaux ministres de vostre Estat: qu'il ne leur suffit pas de publier des escrits seditieux, & qui n'ont autre dessein que d'enflammer les courages des peuples, & de les porter   toute sorte de desordres & de ruines: qu'il ne leur suffit pas de diffamer vostre Maie t , vostre Conseil & les Estats generaux du Royaume, tout le corps de vostre Clerg , toute vostre genereuse Noblesse: mais comme s'ils s'estoient deuou z   ne commettre point de maux qui ne soient tragiques & funestes, ils prennent   tasche d'exposer vostre Maie t    la hayne de ses subiets: osent se rendre   vostre face les deffenseurs de vostre Parlem t contre vous-mesme: osent avec entreprisede enragee luy donner pour protecteur le peuple de Paris, &   tout l'Estat en general, les Princes de vostre sang, se iettans dedans ce desespoir feint & simul , comme

si vostre Maieſté vouloit deſtruire le parlement de
 France qu'elle aime plus affectueuſement : ou bien
 qu'elle vouluſt tourner ſes armes cõtre ſes ſubiets,
 qu'elle affectionne auſſi cherement que ſa propre
 vie. Permettez-moy donc, Sire, que ie deſcrie la
 malice de ces impudens & ſeditieux, afin qu'il ne
 ſoit pas dit, qu'il y a pluſieurs malheureux qui eſcri-
 uent pour accuſer meſchamment la iuſtice du gou-
 uernement de votre Eſtat, & qu'il ne s'en trouue
 pas vn ſeul qui prenne la plume pour le defendre.
 Ce Pacifique ſanglant eſcrit, *pour la deſenſe du Parle-
 ment.* Mais à qui en veut-il en effect, & contre qui
 eſcrit-il, ſi ce n'eſt contre le Roy, qui eſt luy ſeul, le
 vray, le legitime, & le iuſte deſenſeur, & proteſteur
 de ſon Parlement? qui peut luy ſeul le maintenir, &
 le conſeruer en l'honneur, & en la dignité que les
 Roys ſes predeceſſeurs luy ont donnee, qui leur
 veut luy ſeul plus de bien, & leur en peut plus faire
 ſous ſon regne, que tous les hommes enſemble ne
 leur en ſçauroient iamais iuſtement procurer, qui
 ſeul priuatiuemẽt à toute autre perſõne de quelque
 qualité & cõditiõ qu'elle ſoit, a le droit & le pouuoir
 de donner ou d'oſter à ſes parlemens, ce qu'il verra
 bõ eſtre pour le bien de ſon ſeruice, & pour le ſalut
 de ſon Eſtat, & qui neãtmoins n'a iamais eu la volõté
 de deroger à la dignité de ce celebre corps de luſti-
 ce: Ayant eu touſiours au contraire ce deſir enuers
 meſſieurs du parlement, de les combler de biens, de
 felicité, & d'hõneurs, & de les retenir tres-eſtroite-
 ment vnis à ſon ſeruice, par toute ſorte de biens,
 faits, comme ils s'y ſentent naturellement obligez
 de leur coſté, par la dignité de leurs charges, par
 l'exemple de leurs deuanciers, qui ont touſiours
 bien-faict, & par la neceſſité de leur propre conſer-

uatiõ, qui ne peut estre separee d'une entiere & absolue obeissance aux cõmandements de sa Maiesté. Les Rois sont les peres du peuple : & iamais il n'y eut famille au monde si heureusement reglée, qu'il n'y soit arriué que les peres se soient faschez cõtre leurs enfans, & que les enfans n'ayét adressé leurs plaintes à leurs peres: Mais que sur cela, les ennemis du repos de la maison prennét subiet de defédre les enfans contre le pere, ou de diffamer le pere à l'endroit des enfans? Cela ne se faiét point pour y mettre la paix: mais pour faire d'une legere dispute vne querelle formée, d'une esgratigneure vne playe, & d'une estincelle vn embrasement. C'est ce à quoy tendent ces esprits malins, qui veulent sur d'assez foibles occasions, faire croire que tout est perdu, & qui publient dans ce Royaume tres-florissant, ces diaboliques & fausses propheties. *Cassandre.* Vous estes au declin de ceste Monarchie, il faut qu'elle perisse. Il faut qu'il perisse cet Estat. Il a trop long temps duré, & sera-ce en ce temps, plus qu'en nul autre. Et ce sont ces fausses predictions desquelles ce feint Pacifique faiét compte, & que parauanture il a publiées luy mesmes, ayant escrit aussi du mariage du Roy, *Qui sera le seul moyen de le detroner.* Ainsi tasche-t'il malicieusement de faire croire, *Qu'on prepare le fer & le tranchant contre le Parlement: Qu'on y veut aller à main armée pour deschirer ses remonstrances.* Ainsi ose-t'il dire au Roy malheureusement, & sans auoir peur d'estre brisé de la foudre, comme son impudence le merite: *Arrestez-vous là grand Roy, d'aller ainsi à main armée contre le Parlement?* Mais que le Dieu viuât soit Iuge de la peruersité de ton cœur, seditieux que tu es, qui inuèntes malicieusement vne maudite & detestable calomnie, qui combats meschamment

contre le sentiment de ta propre conscience, estant dementy par tout autant qu'il y a de bons François, qui sçauent certainement que cela n'entra iamais dedans l'esprit du Roy, qui sçauent que la Reine a protesté publiquement à Messieurs du Parlement, que le Roy & elle estoient tres-bien persuadez des bonnes, & saines intentions du corps de la Cour: qui sçauent aussi que ces Messieurs qui sont graues en toutes leurs actions, ne peuuent auoir donné lieu à vne apprehension si legere, & si esloignee d'apparence. Il escrit donc, non pas ce qui est veritable, ou qu'il apprehende deuoir aduenir: mais bien ce qu'il voudroit que le Roy feist, & que Messieurs du Parlement creussent, estimant que de ceste opinion suruiendroient des troubles parmy le peuple, qu'il appelle au secours; sur les ruines, les desordres, & les calamitez duquel toutesfois tels seditieux bastissent toutes les esperances de leur fortune à venir. Mais ils se trompent grandement, & Dieu confondra la malice de leur cœur. Car ce Senat tres-auguste, par sa sagesse & prudence ordinaire, sçaura bien pouruoir à ce que tels mauuais garnemens & seditieux soient chastiez selon leur merite, s'ils peuuent estre quelque iour recognus: Il sçaura aussi tres-bien iuger, qu'il est necessaire de faire cesser, le plustost qu'il sera possible, le suiet & pretexte que ces esprits phrenetiques ont pris pour conceuoir ces opinions funestes, & pour cet effect recherchera à l'instant les plus sages, & les plus iustes expediés qu'on pourra trouuer, pour se tirer de ceste occurrence, de laquelle il est tout notoire que les meschans voudroient profiter au preiudice du Roy, au deshonneur de la Cour, & à la ruine du peuple. Ce n'est point monsieur le Prince: Ce n'est

point le peuple de Paris (quoy que ce seditieux s'adresse à eux) qui ont le grand & le premier interest à la conseruation de Messieurs de la Cour de Parlemēt. C'est le Roy, leur souuerain Seigneur, qui ne pourroit les perdre, qu'en s'affoiblissant soy-mesmes, & qui ne pourroit aller à leur ruine, que par celle d'une des plus notables parties de son Estat. Aussi ne recherchent-ils point, ny ne desirent auoir autres intercesseurs ou protecteurs, que la sincerité de leurs intentiōs, que leur zele ordinaire au seruice du Roy, & que le desir qu'ils ont de mourir, plustost que d'aider ny directemēt ny indirectemēt à réuerfer le respect, & l'obeissance absolue que tous les François doiuent à leur Roy. Et sans doute ils trauailleront à punir & chastier comme il faut ceux qui appellent le peuple ou les Princes à leur secours contre le Roy; sc̄achans tres-bien qu'on ne va point au deuant du courroux des Rois, que par de tres-humbles remonstrances, non plus qu'on ne se courrouce point contre le Ciel quand il tonne, ains on y adresse ses vœux & ses prieres, avec humilité & obeissance, dont s'ensuit le salut des hommes, & la paix de l'Vniuers. Aussi le faict dont il est question, requiert qu'on punisse ceux qui veulent rapporter toute sorte d'euenemens à la ruine de l'authorité du Roy, & à la subuersion de l'Estat. Car il ne s'agit point d'aucuns differends qui soient tels, qu'il faille se jeter en des tumultes, & dans les desordres, qui à la fin traient ordinairement avec eux la ruine entière de ceux qui leur ont donné commencement. Messieurs du Parlement auoient présenté des remonstrances au Roy, lequel a déclaré par Arrest de son Conseil, qu'il ne les auoit pas eues pour agreables, pour beaucoup

de raisons tres-importantes à son seruice, & au bien de son Estat. Il a voulu qu'on se contentast de ce que les deputez des Estats generaux du Royaume auoient faict sur ce subiet. Il a voulu differer à vne autre saison le remede des maux qui trauaillent cet Estat, afin de pouruoir cependant à ce qui est le plus important, & qui le touche de plus pres. Il a tres-bien sceu que les Estats parfaicts, & au gouuernement desquels il n'y a rien à redire, ne se trouuent point en ce monde, & que bien souuent les peuples appellēt le mal de l'Estat, ce dequoy ils ne cognoissent pas les causes principales. Il a veu dans ces remonstrances, vn grand nombre d'articles, qui ont voirement esté proposez avec zele par messieurs de la Cour, mais dont les memoires auoient esté fournis par quelques particuliers esmeus de raisons, biē esloignees de celles de l'interest public. Neantmoins il a declaré à Messieurs du Parlement en leur presence, par la bouche de la Reine sa mere, en la responce qu'elle leur fit, que ce n'estoit nullement du corps de la Cour dont il se plaignoit, scachant tres-bien comme il est composé d'vn tres-grand nombre de personnes fides, veritables, & qui ont fort bien meritē du public, par la longueur & la fidelité de leurs seruices. Que ce dont il se faschoit estoit que quelques vns en particulier, auoient employé beaucoup de passion, & d'artifice, pour jetter parmy eux des semences de diuision, lesquelles pourroient causer du mal dans son Estat s'il n'y estoit pourueu. Tout cela n'a point passé les limites de tres-humbles remonstrances des subiets à leur Roy, ny celles d'vn commandement souuerain du Roy, enjoignant à ses subiets de luy laisser gouuerner, & cōmander son Estat par l'aduis de la Reyne,

& de son Conseil, & les admonestant de ne croire point à tout plein de calōnies & d'inuentions proposees, pour diuiser son Estat, & pour rēdre odieux les principaux ministres, desquels Dieu s'est seruy sous le commandement, & l'heureuse regence de la Reyne sa mere, pour retenir durant cinq annees la France en vne pleine paix & tranquillitē. Il n'y a celuy de Messieurs du Parlement, qui puisse sans trembler, pēser aux effects de l'ēuie, & du murmure des peuples contre ceux qui sont employez au gouuernement de l'Estat, s'il vient à considerer de pres ce qu'il auroit fait, & qu'il auroit eu à faire, estāt en leur place, durāt yne minoritē assez longue, & qui a esté trauersee d'aussi fascheuses affaires qu'aucune autre. Il n'y a celuy aussi qui ne sçache cōme il est ordinaire de proposer des accusatiōs cōtre les personnes esleuēes aux charges publiques, & que neātmoins le plus souuent quand on vient à les examiner, elles se trouuent esloignees de la veritē: ce qui ne reuient pas pourtant au deshonneur des Iuges equitables qui les reçoient: d'autant qu'ils sçauent très-bien mettre difference entre les accusatiōs, & les preuues qui conuainquēt. Iamais homme ne fut si stupide, que de iuger mal de la sinceritē des iuges, pour auoir receu de telles accusations. Ny iamais hōme si insensē, que de croire, que les Roys n'ayēt le droit & le pouuoir de iustifier publiquemēt leurs seruiteurs, des plaintes formees contre eux, lors principalement qu'ils voyent qu'il y va du bien de l'estat, lors que ces accusatiōs sont prises des actiōs, que les Roys cognoissent eux mesmes mieux que tout autre ne sçauoit faire, desquelles aussi ils cognoissent les autheurs, le commencemēt & la source de leurs mescontentemens, & la fin qu'ils se sont

proposee. Tant y a que le Roy croist tous les iours en aage, & en experiëce, & il sçaura bien tousiours mettre difference entre le corps de la Cour, qui est sain, & tout entier pour son seruice, & la malice de quelques esprits factieux qui sont en fort petit nombre, lesquels pour se rendre necessaires, & pour se faire caresser en mal faisant, cōme il n'est que trop ordinaire en ce temps, ont cherché de tous costez l'appuy des grāds pour faire leur coup, & ont ietté ces premieres semences de diuision. Et le bon-heur de son regne fera sans doute, que ceux-là mesmes dans peu de temps se remettront deuant les yeux leur deuoir pour le suiure, afin d'attirer sur eux la benediction de Dieu, & l'amour de leur Prince. Grand & Auguste Senat, qui n'avez point besoin des aduantages, & des prerogatiues, que ces flatteurs & seditieux escriuains proposent, nō pour vostre bien, mais pour se preualoir des diuisions de l'Estat, & pour trouuer seureté à leurs crimes; en ces esmotions voyez leurs procedures insolentes, & faictes maintenant recognoistre, comme vous avez tousiours faict, & aux peuples François, & à toutes les nations estrangeres qui ont cognoissance de cet Empire; que vous n'avez point d'autre but que la paix de l'Estat, & la grandeur de vostre Roy, soubsmettans à son bien & à sa volonté toutes vos affections, comme à vostre Pere, & à vostre souuerain Seigneur. Preueniez l'artifice de ceux qui avec dessein veulent interesser vostre corps, au ressentiment de certains termes de l'Arrest du Conseil, lesquels ne vous touchent point ny de pres, ny de loing, & qui n'ont iamais esté entendus, & ne le peuuent, ny ne l'y doiuent estre, que de ceux qui ont, il y a desia long temps publié

hors de la Cour la pluspart de ces bruits, qui ont semé des memoires faux parmy le peuple, & qui finalement par leur artifice en ont donné l'impression à quelques-vns parmy vous, qui se sont laissez surprendre, esmeus neantmoins d'un bon zele, & qui doiuent se contéter d'auoir & le public & leur conscience, qui tesmoignent assez la fidelité de leurs actions, & la verité de leurs paroles: sans qu'il leur faille plus apprehéder le blasme, qui n'est donné qu'à ceux-là seulement, qui par malice ont inuenté beaucoup de faux bruits pour rompre l'harmonie de cet Estat. Allez au deuant des maux que ceux-là recherchent avec grand soin, qui travaillent ordinairement à changer toutes nos chaleurs en fieures populaires: & qui ne parlent de vos aduantages que pour diminuer l'autorité du Roy, qui est la vraye source de la vostre, puis que vous n'avez point d'autre gloire que celle que sa Majesté vous donne, & que vous ne reluisez parmy les peuples que des rayons de sa grace, de sa clemence, & de sa grandeur. A laquelle vous soumettant, comme vous avez tousiours faict fort dignement, vous estes dans cet Estat tout ainsi que les Anges dans l'Vniuers, qui ne veulent pas mesme estre nommez que souz l'ombre du nom de Dieu: non plus que vous ne voulez point auoir aucune dignité, aucune puilliance ny iurisdiction, que souz le souuerain Empire du Roy. Ainsi serez-vous tousiours recognus de tous, non comme vous represente cet impudét flateur, qui vous décrit ainsi que des monstres, un corps à plusieurs testes comme le *Gerion des Poëtes*, à plusieurs mains, comme *Briareus*, ou comme un de ces complices décrit les Estats generaux, *Ainsi qu'un Cerbere à trois testes*: Mais vous

ferez veritablement recognus, & publiez des siecles
 à venir, comme le vray sanctuaire de la Iustice de
 ce Royaume, dans lequel reluisent la pieté enuers
 Dieu & le Roy, & vostre affectiō tousiours encliné
 à la paix de son peuple. Mais voicy la pierre d'a-
 choppement, contre laquelle ces detestables escri-
 uains veulent, au moins s'ils peuuent, faire heurter
 les peuples, à quoy ils font tous leurs efforts, de-
 puis quelque temps, y faisans seruir soigneusement
 tous les euenemens les plus inopinez, & les
 moins preueus. C'est l'alliance Sire, que V. Majesté
 à faite avec la maison d'Espagne, de laquelle ils pre-
 disent tous les malheurs, que nous scauroient sou-
 haiter les plus cruels ennemis de cet Estat, laquelle
 aussi ils descrient avec des exclamatiōs si tragiques,
 qu'on iuge bien aisément de leur rage, & des effects
 qu'elle produiroit, si les peuples ne cognoissoient
 tres-bien comme ils font, la source, & l'origine
 dont elle procede. Au commencement que ceste al-
 liance fut publiée, il n'y auoit que ceux de la Reli-
 gion pretenduë reformée, qui en faisoient du bruit
 sur les fausses impressions que leur donnoient cer-
 tains esprits d'entr'eux, qui estoient mal-contens,
 de voir que leurs Majestez fauorisoient quelques
 vns à la Cour, ausquels ils n'estoient pas bien affe-
 ctionnez. Et cōme pour lors ceux qui estoient dans
 vne de leurs factiōs, laquelle estoit hors de la Cour,
 rendoient aux leurs ceste alliance suspecte, ainsi au
 cōtraire ceux-là qui depuis l'assemblee de Saumur,
 s'estoient portez plus moderémēt aux affaires, l'ap-
 prouuoient grandement, & publioient de viue voix
 & par escrit, que c'estoit vne entreprise impie, que
 les estrangers qui estoient de mesme religion avec
 eux, condamnoient ouuertement comme pleine de
 scandale,

scandale, estant chose indigne de voir que les suiets se formalisent contre le mariage de leur souuerain, & prennent la hardiesse de le vouloir assubietir à souffrir vne rigueur tyrannique, que le moindre d'entr'eux ne voudroit pour rien endurer, à sçauoir de se marier à l'appetit d'autrui, & non pas selon sa volonté, & selon la volonté de ses plus proches. Ils remonstroient aussi qu'en mesme temps la Reine par vne singuliere prudence, & digne de grande louange, auoit entëdu à vne autre alliance, laquelle leur deuoit donner plus de seureté, que celle d'Espagne ne leur pouuoit causer d'ombrage. Et si bië depuis ce temps-là, quelques interests particuliers qui sont aujourd'huy la seule cause de toutes les plaintes, ont faict changer de langage à quelques-uns d'entr'eux; ce n'est qu'une preuue de la misere de ce siecle, & de leur mauvais naturel, qui se chäge par l'vtilité, & n'a repos que dans l'inquietude, & dans les remuemens. Le plus fort argument dont on se seruoit pour diffamer ceste alliance estoit, qu'elle n'auoit point esté bastie sur autre fondemēt que sur celuy de leur ruine; & que c'estoit pour les chasser quelque iour de la France, comme on auoit chassé hors de l'Espagne les Maures & les Grenadins. Et ie ne doute point que ceux qui tirent du profit de toutes occasions pour mal faire, ne continuent encore de leur donner ces faux aduis. Mais leurs majestez y ont fort sagement pourueu par la publication & renouvellemēt des Edicts de pacification, & par les solēnelles declarations qu'elles font tous les iours, d'aimer & d'affectionner tous leurs sujets sans acception de personnes, comme faisoit le feu Roy, de tres-glorieuse memoire. Aussi les mieux aduisez d'entr'eux, & ceux qui auoient eux-mesmes

autres-fois enuoyé en poste dans les Prouinces ces mauuais aduis, parlent maintenāt tout d'une autre façō, depuis qu'ils ont approché de plus pres leurs Majestez, & qu'ils ont recogneu la sincerité, & la bonté de leurs intentions. D'abondant vn chacun peut bien s'appercevoir que les faueurs & les gratifications qu'on leur faict tous les iours, & le soing qu'on a de cōseruer les Edicts faicts en leur faueur; voire mesmes de pardonner facilement les fautes de ceux d'entr'eux qui par inconsideration s'estoiēt portez à des procedures violentes, sont autant de tesmoignages certains, qu'on ne cherche point de leur faire du mal, & que le mariage qui se fait pour la paix de la Chrestienté en general, n'a point de mouuemens secrets pour couvrir la France d'un deluge de sang, qu'on verroit esprendre, si on vouloit regler la religion par les armes, & imprimer la croyance dans les cœurs avec la pointe de l'espee. C'est ce qui faict que par vn iuste iugement de Dieu, qui ruine le mentonge par luy-mesme, il est arriué que les ennemis de ceste Alliance, & de nostre repos, ont témoigné qu'ils sōt hors de sēs en la calōniant. Car au lieu que quelques-vns d'entr'eux menacent ceux de la Religion pret. reformee, de l'inquisition & du bannissement, vn autre non moins maling que ses compagnons, les demantant & se demantāt soy mesme escrit: *Que le Roy d'Espagne, par ce mariage, se rendra amis nrs allies, cassera son Inquisition, ne se souciant du Pape que pour son bien, mettra liberté de consciēce en ses pays, & en vn besoin prendra le Turban, pour nous ruiner.* Ce qui mōstre qu'on ne sçauroit iamais assez blasmer, ny punir ces seditieux qui ne réplisēt leurs escrits, que de l'escume de leurs passions desesperées, & qui ne predisēt aucunes sortes de malheurs, que ceux desquels ils desirent avec impatiēce, l'accom-

plissement. Or depuis quelque tēps on a veu parmy les Catholiques, que quelques vns ont formé des plaintes cōtre ce mariage, qui ont faict croire aux peuples que ceste Alliance les fasche, par ce qu'ils s'imaginent que le Roy sera beaucoup plus absolu dedans son Royaume, quand il n'aura rien à craindre de la part des estrangers. Ce nonobstant quelques ames foibles, apprehendēt que ce ne soit le moyen pour nous precipiter dans vn abyssme de malheurs. Et c'est pour les tromper, & pour fortifier en eux ceste apprehension qu'on escrit, que par ce moyen le Roy va perdre son Royaume. Mais qu'est-cé autre chose, si ce n'est trop grossierement publier le desespoir de leur party? Car qui est celuy auquel ils persuaderont, qu'une Princesse d'Espagne venant en France, puisse plus pour renuerfer le Thrône de nostre Roy, qu'une Princesse de France allant en Espagne, ne pourra pour renuerfer le Thrône de celuy qui leur donne tant d'ombrages? Outre plus, qui est celuy qui croira que ceste tres-illustre Princesse, reseruee du Ciel, pour affermir la paix des deux plus grandes Monarchies de la Chrestienté, venāt en France avec ses Dames d'honneur, y viēne cōme avec des armées des feintes Amazones, pour destruire cet Estat; pour oster la France à son Roy, pour se l'oster à elle-mesme; pour priuer le Roy son Espoux, de son Sceptre, afin d'estre apres cela vne Royne sans Royaume; & comme ces meschās osent dire, abbayans contre elle ainsi que des chiens enragez, afin d'estre *Vne princesse desheritee en Espagne*, & pour estre femme d'un Roy de Frāce, despoüillé de son Estat, & ruiné de fonds-encomble? Hé! que vos impostures sont maudites, Escriptuains, qui remplissez vos cayers de ces fureurs! Hé! que vous

estes outrageux contre la nation Françoisse, & bien mal-heureux de vous deschirer ainsi vous mesmes, comme si vous estiez forcenez ! Car n'est-ce pas publier, qu'une si grande & si puissante Monarchie que la Françoisse, qui a tousiours dompté ses ennemis ; qui à diuerses fois a esté assaillie de toute l'Europe, & s'est neantmoins tres-heureusement conseruee durant douze siècles, qui a resisté aux armes des plus belliqueuses nations de la terre : Que dis-je, ceste grande & invincible Monarchie, est aujourd'huy deuenue si chetifue, & si miserable, que les Espagnols la doiuent engloutir seulement en la regardant ? Et n'est-ce pas releuer la gloire des Espagnols, & prendre plaisir à diffamer, & à deshonorer autant qu'on peut tous les François ? N'est ce pas donner sujet aux ennemis de l'Estat, d'entreprendre hardimēt, s'ils se peuent persuader que la Frâce soit si foible, que ces meschās la disent estre ? Non nō : Ce n'est pas vn Estat que les Estrangers puissent iamais conquerir : Quand mesmes le Roy d'Espagne, & tous ses alliez, auroient sus pieds tout autāt qu'ils ont d'hōmes dans leurs Estats, & qu'ils auroient formé le dessein de nous assubiectir, la moindre Prouince du Royaume auroit dequoy arrester pour long tēps le cours de leurs conquestes. Aussi n'est-ce pas ce que ces gēns là craignent : & ils n'osent pas dire qu'ils ont peur que par ce moyen il n'y aura plus de guerre, ny de troubles en Frâce, & que la paix y florira longuement, qui sera la plus grāde afflictio qui leur puisse arriuer. Le but principal de ceste alliance a esté l'establissement d'une bonne & longue paix entre tous les Princes Chréstiēs. Elle a esté autresfois desirée par le feu Roy : Et si Dom Petro de Toledo venāt en Frâce luy en eust parlé en la forme qu'il deuoit, & cōme il en estoit

chargé, elle eust esté pour lors pleinement arrestee. Les desseins qui luy firent depuis changer celuy-là, ayans esté destruits par sa mort funeste & lamentable; la Reyne tres-bien cōseillée a choisi de ces diuerses affectiōs du feu Roy, celle que le tēps, l'aagē du Roy, & la necessitē des affaires l'ont obligee de suiure. Ce qu'elle a fait conformēmēt au desir vniuersel de tous ceux qui ayment la paix des Princes Chresttiēs; avec le consentemēt mesmes, & l'applaudissement de tous ceux qui se plaignent maintenāt; avec le desir, l'approbation, & les vœux des Estats generaux du Royaume, qui ont presenté de tres-instantes supplications à leurs Majestez pour l'accomplissement de ce mariage. Ce qui est en somme tout ce qu'on peut souhaitter, pour vne alliance authorisee & extraordinairement assiste de la benediction de Dieu. Ces effrontez escriuains qui trāchent des Conseillers d'Estat, mesurent la grandeur des affaires, qui sont les plus importantes, par leur seule passion, & n'en peuuent parler, que suiuant les mouuemēs de leurs affectiōs desbordées. Ils voudroiēt que le Roy rōpist son mariage; que la Reyne défist ceste alliance pour gratifier leurs mauuaises volōtez, & que les ministres de l'Estat se portassent à ceste lascheté, par les apprehēsiōs & les terreurs Paniques, lesquelles ils leur proposent de toutes parts, tantost de la ruine de l'Estat, tantost de la leur en particulier, que de cōseiller à leurs Maieitez de violer leur foy dōnee, & de deschirer avec imprudence, ce que Dieu a cōioint par le moyē de la parole mutuellemēt donnee sur cest affaire, par les deux plus grāds Roys du mode, pour la paix cōmune des Chresttiēs. Et c'est en effect de sirer que le Roy rōpe & viole sa foy publiquemēt, & à la veuē de tout le mode en vn subiet si saint que celuy du mariage, &

cela sur les premières années de son regne, faisant
 eclipser la lumière de sa foy, & de sa cōstāce en son
 Orient. C'est rendre inutiles les vœux de tous les
 Chrestiens, pour la paix de ces deux Monarchies.
 C'est en fin rechercher les moyēs pour nous ietter
 à la guerre, & c'est tout le dessein qu'ont eu les pre-
 miers auteurs de ces plaintes. Mais que ces escri-
 uains, & ceux qui les pratiquēt se souuiennēt, qu'ils
 descriuēt dās leurs Satyres, cet Estat si miserable, si
 desnüé de fināces, & si proche de sa ruine, que c'est
 grāde merueille s'il leur restevne seule estincelle de
 droit iugemēt, qu'ils ne recognoissent que ce seroit
 dōquesvne cruelle impieté, de porter par leur mau-
 uais cōseil vn estat si malade que cestuy-cy, à rōpre
 avec le Roy d'Esp. lequel ils descriuēt au contraire
 si puissant qu'il peut à leur cōpte dissiper & ruiner
 tout l'Estat quād il voudra. En fin ils sōt si impudēs
 que de proposer mesme avec menaces d'autres ma-
 riages au Roy, sur lesquels quād ainsi seroit qu'on
 voudroit se laisser vaincre à leurs persuasiōs, ils ne
 trouueroient pas moins de subiet, pour declamer
 par les exēples du passé cōtre leur Roy, qu'ils font
 en celuy d'Espagne: tant ils sont maudits en leurs
 mauuais iugemens. Que puissent-ils s'amēder pour
 ne deshonorer plus les Frāçois, cōme ils fōt és pais
 esloignez, par le moyē de leurs calōnies & de leurs
 blasphemēs! Vne des plaintes qu'ils fōt aussi reson-
 ner biē haut, c'est que par le moyē de ce mariage, le
 Roy quitte toutes ses anciēnes alliances; & c'est le
 subiet sur lequel ils s'escrient que tout est perdu.
 Mais il est manifeste à toute la Chrestieté, que leurs
 Majestez ont religieusement conserué iusques à pre-
 sent toutes les anciēnes alliances de ceste Couron-
 ne. Ce qu'elles feirēt paroistre en l'affaire de Iuliers
 aussi tost apres la mort du Roy. Et depuis quand.

Messieurs des Estats eurent armé les premiers, & le Marquis de Spinola apres eux, le Roy assisté du Cōseil de la Reyne, a apporté toute sorte de diligence, afin d'arrester le cours de ces remuemēs; & a par sō autorité fait que les choses n'ont point empiré: Ce qu'il a fait en faueur de Messieurs des Estats, avec lesquels il entretiēt soigneusement tous les traittez du feu Roy, sans qu'il y ait rien à redire. Et il est hors de leur puissāce d'alleguer l'exēple d'une seule actiō de l'estat, qui ait esté faite au preiudice des alliances du feu Roy. Car pour ce qui est des affaires de Sauoye, desquelles ils parlent à present plus que d'aucun autre, le Roy y a donné tel ordre, que si le Duc de Sauoye de son costé eust faict ce qu'il pouuoit, il y a long téps que l'armée du Roy d'Espagne se fust retirée. Ce qui neantmoins n'épesche point que tousiours le Roy ne face cognoistre au Roy d'Espagne, le soin qu'il a de maintenir l'alliance de Sauoye, & de s'opposer à son oppressiō. Ce qui véritablement est le principal moyē de sa cōseruatiō: mais ces gens icy qui veulent à leur poste disposer des conseils des Roys, croyēt que c'est abandonner le Duc de Sauoye, de n'enuoyer point des armées à son secours, & de ne faire pas ouuertement la guerre au Roy d'Espagne. Et c'est vne preuue visible, s'ils sont bons ou mauuais Frāçois, puis qu'ils ne desirēt point que le mal d'autrui soit destourné, si ce n'est par le nostre. Eux toutesfois qui sçauent biē qu'au cōmencemēt que le Duc de Sauoye s'arma cōtre le duc de Mâtouë, plusieurs crioiēt qu'il falloit secourir mōsieur de Mâtouë cōtre le Duc de Sauoye. Et encōres à presēt au lieu de louer, & admirer la dextérité du Cōseil du Roy, qui sās entrer en despēce, a laissé arrester les armes du Duc de Sauoye, afin qu'il ne face point souffrir à leurs Majestez cet affrōt, que

d'enuahir l'Estat du Duc de Mantouë nepueu de la Reine, & cousin germain du Roy : qui sans armer, & sans charger les peuples des ruines de la guerre, rend le Roy arbitre de ces deux grands Princes : qui faict que son autorité, laquelle ces mauuais François disent estre si deprimee, va neantmoins iusques là, qu'elle sert de contrepoix dans la propre maison du Roy d'Espagne, pour l'empescher de ruiner les siens. Au lieu donc de loüer & de benir ces cōseils, & de recognoistre que les reigles du gouuernemēt de l'Estat ne suiuent point les caprices ny les passiōs des particuliers ; mais bien l'intérēst & la reputatiō que leurs Majestez ont soigneusement conseruee iusques à present en l'affaire de Sauoye, ils crient au feu & aux armes ; & voudroient voir terminer par le sang, par l'espee, & par la ruine des peuples, ce à quoy tres-sagement le Roy, avec l'assistance de la Reine sa mere, ne veut employer que la prudēce & la dexterité de son Conseil, par le moyen dequoy, sans effusiō de sang, il faict plus paroistre sa Majesté & sa force parmy les nations estrangeres, que par les moyens violens, desquels les issuës ne respondēt pas tousiours aux desseins des bons Rois, ny au zele de leurs peuples. Tant y a que l'issuë fera voir à ces temeraires, que le Roy est tres-assuré qu'en cet affaire il ne suruiendra rien qui puisse donner iuste subiet de le blasmer d'auoir failly à proteger l'Estat du Duc de Sauoye autant qu'il le doit faire. Toutefois le Roy ne gratifiera point les curieux si auant, que de leur publier le secret de ses affaires, duquel ils seroiēt trop mauuais mesnagers ; mais il fera voir en son réps par les effets, que tout ainsi qu'au Ciel Dieu dispose des saisons, nō pas selon que les hommes les veulent, ce qui seroit perdre tout l'Vniuers ;

mais

mais bien selon sa sagesse d'autant plus admirable, qu'elle nous est incogneuë si ce n'est par ses œuvres : Ainsi il veut disposer de ses affaires non selon les appetits des hommes, qui voudroient dans la foule confondre tout par leurs passions desreiglées: mais selon les loix & les maximes d'Estat desquelles on ne void point communémēt le merite, ny la Iustice, que par la fin & le succèz des affaires qu'elles reiglent. Que s'il y eut iamais vne preuue manifeste d'une malice desesperée, & qui feroit bien pis si elle pouuoit; elle est sans doute en l'insolence, & en la forcenerie de ces mal-heureux, parlans impudemment de la Reyne comme ils font, & la blasmans faulxement d'adherer à ceste maxime, *Qu'il faut user de rigueur & l'emporter de haute lute sur les François.* Ils ne peuvent se contenir, quoy qu'ils voyent que c'est vne loy infailible, qu'on ne peut mespriser, ny offencer aucunement la Reyne mere du Roy, sans mespriser, & sans offencer le Roy, iusques au profond de son cœur. Quoy qu'ils voyent les obligations, que l'Estat aura pour iamais à ceste grande, & Auguste Princesse, qui a remply la maison Royale d'une tres-belle, & tres-heureuse lignee; Quoy qu'ils voyent que par sa constante, & ferme resolution, de croire le cōseil que le feu Roy auoit pris pour la conduite de ses affaires, elle a par diuerses fois sauué cest Estat depuis le commencement de la Regence, destournant les malheurs, suscitez par les peuples François par ceux qui bastissoient leur grandeur sur nos ruines. Quoy qu'ils voyent qu'elle est fauorisée de la benediction de Dieu, & de l'amour des peuples; Que iamais aucune Regence n'a esté en France plus heureuse que la sienne;

Qu'elle est, sans qu'aucun le puisse contredire,
 Religieuse, & fort affectionnée à la pieté; Qu'elle
 est bõne, & doiïee d'vne clemẽce extraordinaire;
 Qu'elle est liberalle & encline à faire du bien à
 tous; Qu'elle est d'un naturel doux, paisible & en-
 nemy du sang, & de toute sorte de cruautéz; &
 comme on void dedans, & dehors l'Estat, sans que
 aucun artifice le puisse obscurcir, Qu'elle a ceste
 perfection, qui est fort rare en son sexe & es per-
 sonnes qui sont esleuees en si haute Majesté,
 Qu'elle croit le Conseil, & ce que nous redisons
 comme tres-importãt, Qu'elle croit que le con-
 seil du feu Roy Henry le grand, lequel elle n'a
 point chãgé, & auquel elle ne s'est iamais oposée,
 pour luy preferer ses mouuemens, se rendant en
 cela digne de l'admiration des siecles à venir, que
 tous ses ennemis ne scauroient coter vn seul exẽ-
 ple d'un affaire concernant l'Estat, au cours du-
 quel elle ait fait suiure au Conseil ses affectiõs,
 qu'elle a tousiours ployees au contraire tres-vo-
 lontairemẽt, sous la loy de l'Estat, & sous la droi-
 te raison des Conseils du Roy. Mais comme ceux
 qui blasment contre le Dieu du Ciel nonobstant
 tous les biens qu'il fait aux hommes sur la terre,
 ne se proposent point autre chose, au debordemẽt
 de leur impieté, que d'accomplir leur passiõ: ain-
 si ces maudits calomniateurs, fermans leur œil ma-
 lin à toutes ces choses, lesquelles ils ne peuuent
 nier, ni les desguiser aucunemẽt qu'elles ne soient
 tousiours imprimees dãs la croyance des peuples:
 entre autres faulles & detestables impostures, que
 le Ciel vengeur de l'innocence de ceste Princesse
 chastiera en son tẽps, & par des moyens qui sont
 incogneus aux hommes, ils osent l'accuser, Qu'elle

use de rigueur, & qu'elle le veut emporter de haute lute
les François. Ce qui toutesfois est conuaincu, c'est
 estre vne horrible fausseté, par la cognoissance de
 tous les François ont du contraire : Car on pour-
 roit produire les exemples des choses passées, que
 toute la France a veües, esquelles la Reyne a pru-
 demmēt cedé à la rigueur, & à la malice des hom-
 mes, les guerissant de la mauuaise volonté qu'ils
 auoient, contre le bien de l'Estat par l'excez de sa
 clemence; si ce n'estoit, qu'on ne veut point com-
 me font ces seditieux, rallumer le souuenir des
 maux qu'elle a estouffez, amolissant par sa prudē-
 ce & par sa douceur, les cœurs les plus outrez de
 passion. Que sil y auoit quelque chose à redire en
 son administration, ce seroit plustost qu'elle a esté
 trop facile à pardonner, & à guerir les maux de
 l'Estat, par douceur, & par indulgence. Mais ja à
 Dieu ne plaise, que les gens de bien donnent lieu
 à ces plainctes. Les Princes sont des images de
 Dieu, plus expresses, que tout le reste des hom-
 mes. Et c'est vne maxime infailible de Religion
 que la rigueur, & la clemence de Dieu, ont quel-
 ques mouuemēs, que nous deuons adorer sans les
 cognoistre & sans en rechercher les causes. Ainsi
 puisse tousiours sa Majesté mesler sa douceur, &
 sa clemence auec vne iuste seuerité, pour ne per-
 dre point par vn excez de rigueur, ceux qu'un fa-
 uorable traictement peut retirer du mal : Ny par
 excez de bonté ceux que les bien-faiçts & les gra-
 tifications iettēt bien souuent au mespris, & dans
 vne insolence insupportable, & pleine de ruines!
 Ainsi puisse la France, ioüir longuement de ce
 bon-heur, que de se voir paisible dedās & dehors,
 & d'estre comme elle a esté depuis le commence-

ment de son heureuse Regence pure, & nette de l'effusion du sang des François, que sa seule prudence a bien souuēt destournee, au mesme temps que beaucoup de gens trauailloient à faire des desordres, qui eussent rendu à la fin les campagnes couuertes de sang, & de ruines deplorables. I'ay fait voir, quoy qu'à mon grād regret pour la honte que tous les François en doiuent auoir, l'insolence de laquelle ces factieux ont vsé contre leurs Majestez. Apres tout cela, Messieurs les Princes, & officiers de la Couronne se doiuent resioiir, se voyans assaillis de ces mesmes plumes venimeuses, non seulement par ce qu'ils souffrent en la compagnie du Roy, & de la Reyne, mais aussi par ce que la seule cause en est prise de ce qu'ils se sont tousiours tenus bien & estroitement vnis au seruice de leurs Majestez: Car ceux qui voudroient voir tout cest Empire renuersé, ne peuuent souffrir ceste genereuse resolution, qu'ils leur voyent auoir, de preferer le seruice du Roy, & la paix de l'Estat à toutes autres considerations. C'est Dieu qui les fauorise. Car leurs seruices, & les eternelles obligations, que cest Estat leur a, ne paroistroient point si bien comme elles font, si les ennemis de la trāquillité publique ne les attaquoiēt de leurs calomnies: diffamans ceste franche, & genereuse declaration par eux faite en la presence de leurs Majestez, de n'auoir vie, ny force, ny enfans que pour les employer à leur seruice. Leurs enfans donc apres eux heriterōt des benedictions que tous les François leur doiuent, tout ainsi qu'un chacun recognoist en eux, celles que leurs peres ont meritees de la France, en diuerses saisons, & en des necessitez bien vrgentes. Au surplus leurs

Majestez n'ayās peu euter le blasme de ces mau-
 uais subiects, lesquels, ny la loy de Dieu, ny la
 loy de nature, ny la terreur des loix de l'Estat, le
 regard du Ciel, ny la crainte des hommes, n'ont
 sceu destourner de ce damnable project : & apres
 leurs Majestez les grands du Royame ayans esté
 traictez de mesme: Il n'est pas de merueille s'ils
 ont aussi tesmoigné leur rage, contre les princi-
 paux ministres de l'Estat, qu'ils ont deschirez par
 mille diuerfes calomnies. Les vns ont diffamé
 leurs conseils, comme estans trop portez à la
 douceur, & les ont accusez, comme on accu-
 soit iadis ce grand & sage Romain, qui par sa
 froideur sauua l'Empire contre les armes d'An-
 nibal ; de ce que ils laissent perir les affaires,
 par les mesprits. Les autres au contraire ont fait
 esclater des plaintes contre leur rigueur. Les vns
 les tirent d'un costé, les autres les repoussent. Cō-
 me si ces mauuais François s'estoiēt trāsformez en
 Scithes, qui pensoient rendre assez biē les derniers
 deuoirs à leurs peres, en les mettant en pieces, &
 en les deuorant. Sera-ce donc le salaire de leurs
 longs & penibles seruices? sera-ce dōc ainsi qu'ils
 seront recompensez des hazards & des perils aus-
 quels ils se sont tāt de fois exposez en faisant leurs
 charges, & en trauaillāt pour aider de leur con-
 seil, à empescher la dissipation de l'Estat? sera-ce
 dōc ainsi qu'on leur desirera, ce que les plus cruel-
 les, & les plus barbares nations du monde rendēt
 aux anciens seruiteurs, pour faire voir au milieu
 de leurs brutales cruautez, que parmy eux on ne
 peut perir que pour auoir bien fait? Et où est-ce
 que paroistront à l'aduenir, la vertu, le merite &
 la fidelité, qui sont les degrez par lesquels ils sont

montez à ces charges, si leurs meilleures intentiōs sont blasmees, si leurs personnes sont descriees par l'artifice de leurs enuieux, ou plustost des enuieux du bon-heur de l'Estat, si la passiō & la malice doiuent estre les iuges de leurs seruices, & de leurs peines? Mais il n'en sera pas ainsi. C'estoit le feu Roy, Prince excellent par dessus tous les autres, à choisir les hōmes, lequel ou les a trouués dans les affaires, ou les y a establis. Il leur a ouuert son sein, & a ietté dans le leur toutes les maximes que les longues trauerses qu'il auoit souffertes, & sa longue experience luy auoient fait apprendre. La Reyne a tres-bien suiui son choix durant sa Regence, & le Roy à leur imitatiō les retient cheremēt pour le bien de son seruice. C'est chose aussi que toutes les histoires nous enseignent, que iamaïs on n'a voulu troubler cest Estat durāt les minoritez, ou durant le bas aage des Roys, qu'on n'ait commencé pour pretexte, de s'attaquer à leurs principaux ministres, afin que par là on vint droit à eux. Car aussi n'y auroit-il point d'apparence en vne faction, qui iroit d'abord contre le Roy sans tenter auparauant de faire venir le degoust aux peuples de la fidelité de ses seruiteurs, afin que le desnuant de ceux qui ont la cognoissance & l'experience des affaires, il soit plus facile à ceux qui entreprennēt d'executer leurs desseins dedās la confusion. Cela a esté iusques à present destourné par la sage conduite de la Reyne, quoy qu'il y ait lōg temps qu'on a veu pratiquer à plusieurs les moyens d'en venir à bout. Toute la France sçait qu'elle leur a l'obligatiō d'auoir si dignement seruy la Reyne en la Régence, qu'estant d'ailleurs assistée des Princes, des officiers de la

Couronne, & autres grands du Royaume, elle a puissamment empesché que la Frâce n'ait esté acablée des guerres de religion ou d'Estat, desquelles elle a esté bien souuent menacée durant la minorité. Ce ne sont point de nouueaux ouuriers, ny des apprentifs aux affaires, estans les plus anciens hommes d'Estat de tout le Royaume, & estans tels que ceux qui leur portent enuie, les peuuent iustement choisir pour les patrons & exemples des vertus, qu'il leur faut auoir pour approcher des charges qu'ils tiennent, si tât est que iamais ils s'en vueillent rēdre dignes. Soustenez donques, soustenez hardiment vos dignitez, sages, & bien-heureux ministres du plus grand Roy & d'un des plus puissans Royaumes du monde; & cōtinuez en ceste ferme, & sainte resolution de faire par vos bons & salutaires conseils, que leurs Majestez à quelque prix que ce soit conseruent la France en paix, & en esloignent de plus en plus l'effusion du sang humain. Et ne doutez point que Dieu qui est le Dieu de paix, & qui est ennemy du sang, & des cruautez ne vous benisse deuant tout le monde. Et vous genereux Princes & Seigneurs qui auez ordinairement depuis la mort du Roy, aux plus grādes & aux plus vrgentes necessitez de l'Estat, donné vos conseils avec eux, pour seruir la Reyne, en vn si grand nombre de tres-grandes occurrences, & qui les auez genereusement appuyez de vos resolutions, afin qu'ils ne defaillissent point sous la pesanteur des affaires, rendans par vos qualitez les deliberations prinsees pour le salut de l'Estat plus fortes & plus considerables: soyez tesmoins deuant toute la France cōtre leurs enuieux, de leur fidelité, & de leur merite, tout

ainsi qu'ils sont tesmoins ordinaires, & tous les bons François avec eux, de la grandeur de vostre courage, pour la defense du Roy; de la sagesse, & & de la suffisance de vos salutaires aduis, & de vostre constance pour appuyer l'Estat, & faire le seruice du Roy, sans que iamais rien vous en ait peu separer. Je les entends encores crier & faire ces plaintes, que les finances du Roy sont fort affoiblies, par la profusion qu'on en a faite: mais chacun void bien comme ces esprits ne recherchent que les moyens de faire renouueller la memoire des maux passez; & de remettre deuant les yeux d'un chacun, l'embrasement que la Reyne a par sa prudence, & par son courage esteint au grand bien, profit & contentement de tout le Royaume. Car c'est pour en venir à bout, qu'il a fallu, sinon les espuiser du tout; pour le moins les diminuer, & les affoiblir grandement. Et il n'y a pas si long tēps que chacun ne s'en souuienne. Quoy que la bonté de la Reyne, & nostre repos voulussent que la memoire en fust pour iamais esteinte; & que telles pestes qui s'approchent des Princes pour les flater de leurs escrits imprudēs, par lesquels ils les offencent plus qu'ils ne leur seruēt, leur fussent en horreur ainsi qu'ils doiuent estre, afin que leur insolence ne trouuillast point à ruiner le repos, & le calme que les grandes & immenses despenses de l'Estat, nous ont si cherement acheptez. Dequoy tant s'en faut, qu'il faille blasmer leurs Majestez, qu'au contraire tous les bons François qui aiment la paix, l'vnion, & la seureté de l'Estat, les en doiuent grandemēt louer & benir. Il seroit voirement à desirer que les finances du Roy eussent esté moins assaillies des importūns quelles n'ont esté:

esté. Et que les François eussét esté plus soigneux de conseruer leur ancienne probité, qui estoit tout esloignée de la recherche des recompenses excessiues: mais les malheurs & les mescontentemens nous ont de si pres enuironnés, si souuent, & à si diuerses fois, qu'on ne pouuoit faire autrement qu'on a fait, si on n'eust voulu perdre tout. Parmy tout cela, on n'oublie point aussi de blâmer la fortune de quelques seruiteurs, qui ont plus largement recueilly les bien-faits de la Reyne; & ie m'assure qu'il n'y a point d'homme de sens rassis qui ne voye dans ces libelles, infinies hyperboles sur ce subiet, & qui n'y lise ouuerement beaucoup de choses que la seule rage, & le desespoir leur ont peu faire escrire, pour essayer, par le moyen de ce qui est ordinaire à tous les Roys, & qui est comme vne marque eminente de leur grandeur, de raualer, & de représenter en mauuaise forme, le bon-heur du gouuernement. La fin qu'ils se proposent rend leur plainte fort inique: & la grâdeur des Princes ne peut pas estre reiglee es bien-faits qu'ils esslargissent, de telle façon qu'on les puisse faire departir esgalemment. Iamais il n'en fut aucû, qui n'en v'fist ainsi. Et beaucoup des plus grandes maisons de ce Royaume, qui seruent auourd'huy dignement à l'Estat, rendent tesmoignage qu'à la fin, les biës que les Roys font à ceux qu'ils veulent esleuer se trouuent toujours dans l'Estat; & que les enfans qui en heritent payent avec le temps le public par leurs seruices; & font que les peuples, qui se trouuent esloignez de l'enuie prennent par ce moyen leur part, en la bonne fortune de ceux desquels on s'est plaint autresfois. Les exemples en sont si fami-

liers, & si frequens en France que chacun les void. Iamais aucun Estat ne fut si heureux, que d'auoir vne loy certaine pour les gratifications; & iamais on ne scauroit assez blasmer ceux qui veulent lier les affectiōs des Princes aux regles de leur passion; qui veulēt leur oster la liberté qu'ils ont eux-mesmes biē chere, de faire du bien à qui il leur plaist, & qui veulent ouuertement se seruir de ce pre-texte, pour diminuer l'autorité du Roy & exposer au mespris des peuples le gouvernement de l'Estat. En fin ie supplie treshumblement tous les gens de bien, qui oyent faire ces plaintes, de se ressouuenir de la procédure que tint anciennement Scipion l'Aphricain, lequel obligea plus sa republique qu'aucun homme de son temps. Ses enuieux l'accuserent d'auoir mal administré l'argent du public & l'en mirent en procès. Quand il fut venu deuant les iuges, au lieu d'entrer en excuses, & iustifications, estant tres-assuré de sa bonne conscience, & du desir qu'il auoit tousiours eu de bien seruir; il leur dit gehereusement, *Vn tel iour que celuy-cy, i'obtins vne belle victoire sur Annibal, parquoy laissant tout estrif & toute contention, ie suis d'avis que nous allions au Capitole, pour rendre graces à Dieu d'une telle victoire.* Ce qu'il fit à l'instant, estant suiuy de tout le peuple, qui courut apres luy, sans tenir aucū compte de ses accusateurs, quoy qu'ils fussent les Tribuns du peuple. Ainsi pour payer de raison toutes ces plaintes, la Reyné nous dit, que nous nous souuenions d'auoir passé cinq années en paix; qu'il vaut beaucoup mieux auoir perdu les escus à millions, que d'auoir veu destruire les milliers des hommes; & qu'il vaut mieux auoir

épandu l'argent du Roy parmi tous les François, que d'auoir veu couler le sang des François en tous les endroits du Royaume. Ils s'escrient aussi sur les preparatifs du voyage du Roy ; *Que la Reyne à main armée veut executer ce tragique mariage, pour tesmoigner sa passion.* Au lieu qu'un chacun void, que le Roy ne doit pas trauerser la plus grande partie de son Royaume sans auoir avec soy les armes de l'Estat, & que quiconque veut blasmer ceste procedure, a sans doute quelque mauuais dessein. Mais ne veulent ils pas se souuenir pour le moins vne fois, de ne destruire point eux-mêmes leurs propres discours ? Ils crient que par le moyen de ce mariage les estrangers vont oster le throne du Roy : Et icy ils se faschent que le Roy va aboucher ces estrangers à main armée. *Que* s'ils nous deuoient faire du mal, est-il pas donc bien iuste que le Roy leur face voir quelque esclair des forces de son Empire ? *Que* ceste genereuse noblesse qui l'accõpagne, face cognoistre à tout le mōde, qu'elle peut suffire nō seulement à defendre cet estat mais aussi à cõquerir les estats de ceux qui nous voudroient nuire ? Si en ceste occasiō le Roy ne faisoit voir vne partie de sa puissance, il y auroit plus de subiect de plainte ; & ces malicieux ne l'oublieroient pas, qu'il n'y en a pas de le voir marcher, en tel estat, qu'il ne doit rien craindre, ny au dedans, ny au dehors du Royaume. Son aage, sa face, son innocence, sa bonté naturelle, l'amour qu'il porte à son peuple, la memoire du feu Roy ; & les esperances que tous les François ont conceuës de la felicité de cest Estat sous son regne, sont des trespuissans moyers pour dissiper l'artifice de ceux qui parlēt de ses armes pour

mettre en ombrage les peuples. Qui verront au contraire avec ioye en diuerses Prouinces, ce ieune Mars, fuiuy des foudres de sa genereuse Noblesse; & de la meilleure milice du monde; portant neant-moins sur son front les graces, la douceur, & l'image de la beneficence de Dieu, qui employe ses bien-faits, pour cōuertir ses ennemis mesmes à son seruice, en leur faisant du bien. Qui verront avec ioye la Reyne à laquelle ils ont tant d'obligatiōs; comme à la mere de leur Roy; & à celle qui a par sa prudence sauué l'Estat. Qui verrōt le Roy accōpagné des Princes de son sang, qui ne le peuuēt, & ne le doiuent nō plus abandonner en ces ocurrencēs, que les estoillēs ne peuuent quitter le firmament. C'est aussi toute leur gloire de se tenir aupres du Roy, qui les cherira comme son propre sang; & les ayant, & approchant de sa personne, fera cause qu'on les regardera, cōme les principaux & les premiers mēbres de ce grand Empire. Ils sçauront par mesme moyen d'esloigner d'aupres d'eux tous ces flateurs seditieux, qui ne portent iamais dans les maisons des grāds que malheurs & ruines; & nonobstant toutes leurs pratiques & menees, qu'ils estoufferont par leur prudence, ils rendront au Roy ce qu'ils luy doiuent, comme à leur Roy, à leur chef, & à leur souuerain. Et de mesmes le Roy leur departira les dignitez, & les graces dōt leur naissance, & leurs merites les rendent dignes. Et mal-heur soit sur ceux qui directement, ny indirectement trauaillēt à troubler ceste sainte resolution! Puisse le ciel vengeur des iniquitez, tesmoigner par les punitions qu'il deschargea sur eux, combien leur mauuais dessein luy desplaist,

& combien il a en horreur leur faction, qui n'a pour vifée que la ruine de la Religio, & de l'Eftat. Le plus grand homme qui fust entre les Romains de fon temps, quoy que fort ieune d'aage, eftant vn iour falué du tiltre de Roy par des foldats Espagnols, dans son armee victorieufe, leur impofa filence avec vne grande feuerité, & les coniuira de transferer toute l'affection qu'ils luy portoient au bien de l'empire Romain, pour la grandeur duquel feulemeñt il vouloit viure. Ceste conftance & ceste modestie genereufe furent fuiuies des gloires, & des triôphes qu'il eut pour auoir, après s'eftre vaincu soy-mefmes, vaincu l'Afrique, qui eftoit vne des plus floriffantes parties du monde; & ont fait que tous les fiecles l'ont eftimé comme vne des merueilles de l'vniuers en courage, en chafteté, en fidelité, & en toute forte de vertus requifes és personnes des Princes. Le bon heur de la France fera que Monsieur le Prince ayant cett exemple deuant fes yeux, & preferant la vertu de Scipion l'Africain, à toutes les maudites flateries de ces efprits remuans, qui font comunémēt la lie de hommes; & qui ne ſemblent eſtre nez que pour deſpiter l'ordre de la nature; il impoſera ſilence à tous ces faiſeurs de libelles, qui par vn zèle indiscret & malicieux, & pour faſcher leurs Majeſtez, luy adreſſent leurs propos. Il leur commandera de regarder au Roy ſeul; & les coniuera comme il doibt, de transferer à leurs Majeſtez toutes leurs affections, puis qu'il ne doit, & ne peut auoir force, puiſſance, ny autorité que pour ſeruir, & pour ſuiure le Roy en ſes importantes affaires. Grand Prince permettez moy que ie vous propoſe les benedictions de Dieu & des hōmes, ſi

vous suiuez le chemin, que la nature & la loy de l'Estat vous montrent, afin que vous voyez de vous mesmes au contraire les precipices, & les abysses des iugemens de Dieu, & les impreca-tions des peuples, sur ceux qui esperans d'attirer à eux par voyes obliques l'autorité d'autrui, se rendent en fin desnuez de la leur propre; & s'exposent au mespris de leur siecle, & à la iuste indignation des siecles sui-uans. Dieu a doi-ue vostre personne d'une grande promptitude d'esprit: & comme il vous a fait naistre Prince de la plus glorieuse maison de l'uniuers, il vous a aussi distribué de tres-excellentes parties; qui seront admirées de tous les François, si vous les reglez par l'affection, la fidelité & l'obeissance que vous deuez au Roy; & si vous honorez & respectez la Reyne sa mere, ainsi que la reuerence que vous deuez au Roy, les biens qu'elle vous a faicts, & l'amour que tout l'Estat luy porte, vous y obligent. Tousiours vous sera-il plus seur, & plus honorable d'auoir tout l'Estat qui vous aime en bien faisant, que d'auoir seulement vn mal-heureux chetif nombre de mauuais Conseillers; & de flateurs inutiles, si iamais nostre malheur estoit tel, ce que Dieu ne permettra point, que vous laissassiez surprendre & corrompre vos bonnes intentions par leurs artifices. I'ose vous coniu-er à mains iointes de desirer & requerir en tous ceux qui vous approcheront pour vous parler des affaires d'Estat; S'ils s-nt amateurs de la pieté, & tenans dans leur cœur, veritable la religion de laquelle ils font profession; S'ils sont s-ns reproche en leur vie: S'ils aiment le Roy & la Reyne: S'ils sont assez satisfaits de leurs charges sans aspirer à celles d'autrui: Et s'ils sont contents de leur condition presente, sans

vous donner iuste subiet de craindre, qu'ils puissent auoir dessein de la rendre meilleure, en abandonnant dans le precipice leurs premiers bien-facteurs, apres les y auoir iettez par leurs mauuais conseils: S'ils ont l'experience des miseres qui ont passé sur ce Royaume, ou pour le moins la cognoissance des fautes faites par les Princes, & des ruines qui les ont suiuiés biē tost apres, au siecle dernier, & en la memoire de nos peres. Je m'assure que si vous les examinez par ces regles, & n'escoutez pas vn seul de ceux qui ne s'y trouueront pas conformes, que vous n'aurez iamais de mescontentement qui trauaille vostre esprit, que vous serez tousiours aupres du Roy, & que toute sorte de bon-heur florira dans vostre maison. En fin les peuples sont ceux que les auteurs des factions, taschent de corrompre ordinairement par les faux bruits, & par leurs menées maudites. Nous l'auons veu à nostre grād regret en ce Royaume; & l'auons si bien senti, que ce nous seroit vne grande honte, si tant, & de si longs mal-heurs ne nous auoient rendus bien sages. C'est vne des plus grandes raisons de la tranquillité de l'Estat, que les peuples ne veulent point se laisser persuader comme par le passé. On a heurté souuēt chez eux, on les a sondez de tous costez: mais Dieu n'a point permis iusqu'à present, qu'ils ayent voulu seruir de iouiet à personne. On a durant quelque temps seruy d'vn couuert de Religion, ceux qui par le mal-heur du tēps, sont séparés de l'Eglise. Mais en moins d'vne année ils ont veu à trauers que le plat estoit vuide, & que la religion de ceux qui veulēt émouuoir les peuples par ce pretexte, n'a qu'vne maxime, qui est de lier & de desliar

toutes choses par leur propre interest. Et il est ordinaire entr'eux de recognoistre en l'acroissement du zele de quelques vns, qu'ils ne sont pas contents à la Cour, & qu'on y a pourueu quand ils entendent parler du bien de l'Estat, ceux qui brusloient auparavant d'amour diuin. Ce flux, & reflux de pieté a bien rendu sages ces peuples; & de ce costé il n'y a rien à craindre. Je voy desia toutes les villes du Royaume en prieres continuelles, pour le bon-heur du mariage du Roy, & pour la prosperité de son voyage. Et par dessus toutes les autres, la ville de Paris, la bien aymee du Roy, & qui a plus resenty le bonheur, & les felicitez de l'heureuse regence de la Reyne, que toutes les autres villes ensemble, qui a depuis la mort du Roy tesmoigné tant de zele au seruice de leurs Majestez, qu'il faut s'asseurer que tout le monde ensemble ne pourroit pas esbranler ny alterer l'affection sincere, & ardente que les Parisiens ont à la paix publique du Royaume. Ces seditieux qui ont fait courir diuers faux bruits dans Paris, pour en empescher la continuatiō; qui encore par leurs libelles les appellent au secours, cōme s'ils auoient part à leurs menées, seront honteux de voir le dueil & le regret qu'ils meneront au depart de leurs Majestez; de voir avec quelle impatience ils attendront leur retour pour faire retentir l'air de leurs cris, & pour le remplir de leurs feux de ioye, de voir que cependant toutes choses se passeront si doucement, que ceste grande ville seruira d'exemple de paix, & de tranquillité à toutes les autres. Que si le souuenir de vos calamitez passees vous touche encor, ô Parisiens, si vous sentez vos elicitez presentes; si vous iouyſſez de l'aise, & de

la douceur où vous estes, si vous voyez la grādeur, les richesses, les embellissemens, & les accroissemens de vostre ville, si vous cōprenez par l'absence des trois ou quatre mois de l'annee passée, les malheurs que vous porteroit vne plus lōgue absence; si vous voyez que la moindre alteration du repos public, iette vostre ville aux plus grāds malheurs, & dans les plus extremes calamitez qu'on scauroit dire, voyez ie vous prie le soin que vous devez auoir d'estouffer toutes les plus legeres semences des maux de l'Estat, d'auoir en horreur tous les seditieux; de supprimer tous ces maudits écrits, qui peuent falcher leurs Majestez, & empoisonner les hommes du venin de rebellion, voire mesmes de faire que tous vos carrefours ayēt pour quelque temps des personnes destinées à en rechercher les auteurs, pour leur faire recevoir le chastiment que leur crime merite. Vous y estes obligez par le desir de toute la France, qui se promet que quoy qu'on sçache faire, iamais Paris ne regardera que le Roy. Et ainsi Sire, vostre Majesté sçaura vser à l'endroit de vostre Parlemēt, de toute sorte de douceur, & de bien-vueillāce, prenant en bonne part son zele à vostre seruice: comme aussi vostre Parlement n'aura autre plus grād soing que de se tenir dans l'obeissance de vos cōmandemens. La Reyne vostre mere sera tousiours aymee, & reuerée de tous vos bons subiets, vostre mariage se consommera à l'honneur & à la gloire de Dieu, pour la paix vniuerselle des Chrestiens, & pour la felicité de ce Royaume, qui en attend toute sorte de benedictions. Les Princes de vostre sang, & autres Princes seront aupres de vostre Majesté au rang qui leur est deu. Tous les grands

du Royaume vous enuironneront, & auront part à l'honneur & à la gloire d'auoir aidé à soustenir la paix. Les anciens ministres de vostre Estat seront encouragez par vostre Majesté, à l'exercice de leurs charges. Tous vos peuples feront resonner le ciel de leurs cris de ioye, & de leurs prieres: & par dessus tous le peuple de vostre ville de Paris, qui n'aura point de plus grand contentement durant l'absence de vostre Majesté, que celuy que nous prenons tous, Sire, és fermes esperances que nous auons, de voir la paix, & la Iustice florir sous vostre regne, de voir vostre Estat continuer son ancienne splendeur; de voir quand il en sera tēps, le Louure remply de vostre glorieuse lignee, & par dessus toutes choses, de voir le Dieu du Ciel, qui vous fait tous les iours tant de graces, estre honoré, & seruy sous vostre Empire, ainsi qu'il appartient.

F I N.



